



Compostela, 25 de setembro de 2012. Mentres a Educación Ambiental agoniza, en paralelo ás políticas que a Xunta está a executar na educación e no ambiente, o DOG reflicte unha fotografía do preocupante estado da formación ambiental neste país. Malia ás numerosas recomendacións ([OIT](#) , [ONU-PNUMA](#)) que apuntan aos millóns de postos de traballo que se poderían criar vencellados ao medio ambiente e á ["economía verde"](#)

, a Xunta non só

reduxo a cero o investimento en educación ambiental

, senón que os cursos de formación non regradada convocados en 2012 indican o curioso concepto que a administración ten da

"formación ambiental"

: 26 cursos de "aplicador/manipulador de biocidas"; 2 cursos de prevención e loita contra os lumes; 1 de "ruído ambiental" e 1 de "mar"

[Listaxe completa cursos Xunta 2012](#)

CENSURADO NOS MEDIOS SUBVENCIONADOS POLA XUNTA

As iniciativas da actual administración galega na promoción da educación ambiental (EA) son case inexistentes, coa [EGEA \(Estratexia Galega de Educación Ambiental\)](#) esquecida nun caixón dende hai anos. Ao brutal recorte de actividades e recursos (0€ en 2012); ao peche e infrautilización de equipamentos (Centro de Interpretación A Siradella, C.I. do P.N. Monte Aloia, do P.N da Enciña da Lastra; do P.N de Corrubedo, Aula de Chelo...); ao abandono da EA no sistema educativo polos continuos recortes; aos despedimentos, e desaparición de empresas hai que engadir o escandaloso desbaldimento de recursos en eco-mausoleos como o

[Centro de Interpretación dos Espazos Naturais Galegos de Ourense](#)

(8 millóns de €) ou das das Illas Atlánticas, ou os gastos en "intervencións" agresivas en espazos naturais (

[desbroces en espazos costeiros](#)

,
[baleirado da lagoa da Frouxeira](#)

...)

Diante deste panorama nos programas, equipamentos e actuacións de Educación Ambiental, as escasas iniciativas institucionais postas en marcha pola Xunta no eido da formación non regradada, esqueceron o feito de que o medio ambiente está a ser e será no futuro (recomendacións da OIT e a ONU), unha importante fonte de postos de traballo e actividade económica relacionados coa súa protección e as iniciativas sustentábeis para a súa posta en valor.

Unha simples revisión do DOG revela que a Xunta está a ofertar no eido da formación ambiental non regrada, unha sorprendente listaxe de cursos: Destaca con moito, o número de sesións adicadas ao **manexo e aplicación de biocidas** (26) en comparación con outros cursos de positivas repercusións para o ambiente como a prevención dos lumes (2) ou a loita contra o ruído (1 curso). Esta sorprendente obsesión da Xunta cos cursos de biocidas (alén doutras posíbeis causas relacionadas coas adxudicacións) podería ter unha explicación na teima da administración (galega e estatal) en dar traballo á patronal química coas súas políticas (forestal, agrícola, industrial, de residuos...): fumigacións, agroquímicos, transxénicos, minaría de cianuro, incineradoras, etc.

Fronte a isto, destaca a total ausencia de formación en conservación, custodia do territorio, voluntariado ambiental, eco-auditorías e aforro de recursos naturais, iniciativas produtivas en espazos protexidos, turismo de natureza, ornitolóxico, xeolóxico... etc. Semella que a Xunta prefere formar á cidadanía no manexo do Cascade, do Round-up e da motoserra.